



Siri Terjun Dunia FINA

Pandelela-Jun Hoong hadiah gangsa

Kuala Lumpur:

Gandingan Pandelela Rinong-Cheong Jun Hoong (kanan) terus menyinar apabila menghadihkan gangsa acara 10 meter platform seirama di pusingan kedua Siri Terjun Dunia FINA di Ghuangzhou, China, semalam.

Bagaimanapun pasangan Korea Utara Kim Kuk-hyang-Kim Mi-rae tampil sebagai pencabar baru apabila meraih perak manakala pasangan China Ren Qian-Chang Yani meraih emas.

Hakikat berkenaan diakui ketua jurulatih negara Yang Zhuliang yang tidak memandang ringan pasangan Korea Utara yang meraih tempat keempat di Olimpik Rio tahun lalu.

"Pasangan Korea Utara mempamerkan terjunan terakhir yang cemerlang untuk mengatasi kita. Mereka bakal menjadi ancaman pada

kejohanan akan datang.

"Bagaimanapun saya gembira dengan persembahan dua penerjun ini. Persembahan mereka lebih kemas berbanding pusingan pertama ketika memenangi perak di Beijing minggu lalu," jelas Zhuliang.

China terlalu unggul apabila mengumpul 347.82 mata bagi meraih emas kedua selepas siri pertama di Beijing.

Selepas bersaing sengit, Kuk-hyang-Mi-rae memastikan perak dengan meraih 83.52 mata pada terjunan kelima untuk mengumpul keseluruhan 339.72 mata.

Pandelela-Jun Hoong pula sekadar meraih 77.76 mata pada terjunan kelima dan terpaksa akur dengan gangsa apabila mengumpul 332.46 mata.

Hasrat Nur Dhabitah Sabri-Wendy Ng untuk turut menaiki podium tidak kesampaian apabila menduduki tempat keempat acara 3 meter terjun seirama.



PANDELELA